

16 AUG 1996
Abdullah-WTO

MALAYSIA TIDAK AKAN TUNDUK KEPADA SEBARANG TEKANAN DI WTO

KUALA LUMPUR, 16 Ogos (Bernama) -- Malaysia tidak akan tunduk kepada sebarang tekanan untuk mengenakan syarat-syarat yang tiada kaitan dengan isu perdagangan di Persidangan Pertubuhan Perdagangan Sedunia (WTO) di Singapura, kata Menteri Luar Datuk Abdullah Haji Ahmad Badawi hari ini.

"Pendirian ini telah banyak kali diperjelaskan dan kita bersedia menghadapi apa jua cabaran," kata beliau kepada pemberita selepas menerima kunjungan hormat Naib Pengerusi Majlis Tertinggi Ekonomi Kazakhstan, Erzhan Utembacz, di Wisma Putra.

Semalam, Perdana Menteri Datuk Seri Dr Mahathir Mohamad berkata ada kemungkinan beberapa negara maju akan cuba menguasai persidangan WTO yang dijadualkan Disember ini semata-mata untuk menyekat perkembangan ekonomi negara-negara Asia.

"Kita tidak akan terima sebarang tekanan yang dikenakan terhadap kita untuk terima syarat yang tidak kena-mengena dengan perdagangan contohnya isu seperti alam sekitar atau tenaga kerja," kata Abdullah.

Mengenai lawatan Utembacz, Abdullah berkata Malaysia dan Kazakhstan akan mempertingkatkan hubungan perdagangan terutamanya antara sektor swasta masing-masing.

Utembacz juga ingin meninjau dengan lebih dekat pembangunan Malaysia dan berbincang dengan pegawai-pegawai tinggi dan perancang ekonomi di peringkat persekutuan dan negeri.

"Lawatan ini adalah satu langkah permulaan untuk mewujudkan kerjasama yang lebih baik khusus kepada pegawai tinggi dan perancang ekonomi dari kedua-dua buah negara," kata Abdullah.

Beliau juga berkata kerajaan bersedia menerima pelatih-pelatih dan pegawai-pegawai dari Kazakhstan untuk mengikuti kursus dalam bidang-bidang pembangunan serta memberi pendedahan kepada mereka terutama mengenai projek di peringkat desa.

Abdullah berkata Malaysia dan Kazakhstan mempunyai potensi yang besar dalam bidang ekonomi dan menyeru pihak swasta mengambil peluang untuk menjalinkan usahasama di republik itu.

"Peluang pelaburan juga banyak terutama dalam industri perlombongan, petro-kimia, galian, pembinaan dan pelancongan, terpulang kepada pihak swasta kita untuk mengenal pasti apakah bidang-bidang pelaburan yang mampu mereka ceburi". -- BERNAMA

WNZ PR